



**Na Elder Russell M. Nelson**

No te Pūpū no te Tino Ahuru Ma Piti Aposetolo

# Te patururaa i te mau peropheta

*Ua riro ta tatou patururaa i te mau peropheta ei fafauraa ia tatou iho ia rave i te mau mea atoa no te turu i te mau tautooraa matamua e tohuhia mai e ratou.*

**E** te peresideni Eyring, mauruuru no ta oe poro'i faaūru e te haamaramama. E to'u mau taea'e e mau tuahine here, te mauruuru nei matou no to outou faaroo e to outou itoito. I nanahi ra, ua anihia tatou ta'itahi ia paturu ia Thomas S. Monson ei peropheta na te Atua e ei Peresideni no te Ekalesia a te Fatu. Te himene pinepine nei tatou, « Mauruuru matou e te Atua no ta oe na peropheta ».<sup>1</sup> Te taa maitai ra anei tatou i te auraa o te reira ? A feruri na i te haamatairaa ta te Fatu i horo'a ia tatou ia paturu i Ta'na peropheta, o oia o te horo'a mai nei i te a'o pora'o ore, viivii ore, ma te ore e haapa'o i to'na iho hinaaro, e tei hope roa ho'i i te parau mau !

Nahea tatou e paturu mau ai i te hoê peropheta ? Na mua roa a riro mai ai oia ei Peresideni no te Ekalesia, ua faataa mai te peresideni Joseph F. Smith : « E hopoi'a faufaa te reira no te Feia Mo'a ia... paturu i te feia mana o te Ekalesia, ia na reirahia, eiaha râ na roto noa i te afa'iraa i te rima i ni'a, na roto atoa râ i te *ohipa* e te parau mau ».<sup>2</sup>

Te haamana'o maitai nei au i te ohipa taa ê roa ta'u i rave no te patururaa i te hoê peropheta. Ei taote

rapaau ma'i e ei taote mafatu, e hopoi'a ia na'u ia tapû i te mafatu o te peresideni Spencer W. Kimball i te matahiti 1972, i tera taime e mono peresideni oia no te Pūpū no te Tino Ahuru Ma Piti Aposetolo. E mea fifi roa to'na tapuraa. Aita ho'i to'u aravihi no te raveraa i te reira huru tapûraa i ni'a i te hoê taata ma'i mafatu e 77 matahiti i te paari. Ua parau vau e ere i te mea ti'a ia ravehia teie tapûraa e ua faaara vau i te peresideni Kimball e te Peresideniraa Matamua. Ma te faaroo râ, ua ma'iti te peresideni Kimball, ia ravehia te reira, no te mea noa e, ua a'o te Peresideniraa Matamua i te reira. Na te reira i faa'ite i to'na huru patururaa i to'na feia faatere ! E ua mata'u vau i taua faaotiraa ra !

Mauruuru i te Fatu, ua manuia te tapûraa. I te haamata-faahou-raa te mafatu o te peresideni Kimball i te otu'i, e mea puai rahi roa ia ! I taua iho taime ra, ua noaa ia'u te hoê faa'iteraa papû a te Varua e e riro mai teie taata ei Peresideni no te Ekalesia i te hoê mahana !<sup>3</sup>

Ua ite outou e aha te ohipa i tupu i muri mai. E 20 noa ava'e i muri mai, ua riro mai te peresideni Kimball ei

Peresideni no te Ekalesia. E ua faatere u'ana oia e ma te itoito e rave rahi matahiti.

Mai te reira mai â taime, ua paturu tatou i te mau peresideni Ezra Taft Benson, Howard W. Hunter, Gordon B. Hinckley, e Thomas S. Monson i teie nei ei mau Peresideni no te Ekalesia— e peropheta i to'na auraa mau !

E to'u mau taea'e e tuahine, mai te mea e ohipa ta te Faaho'i-faahou-raa o te Evanelia i rave, o te faaoreraa ia i te mana'o hape e, ua faaea te Atua i te paraparau i Ta'na mau tamarii. Aore roa e mea atea roa'tu i te parau mau. Ua arata'i te hoê peropheta i te Ekalesia a te Atua i te mau tau tuuraa atoa o te evanelia, mai ia Adamu mai e tae noa mai â i teie nei mahana.<sup>4</sup> Te faa'ite papû nei te mau peropheta no ni'a ia Iesu Mesia—no ni'a i To'na hanahana e Ta'na misioni e taviniraa i ni'a i te fenua nei.<sup>5</sup> Te faahanahana nei tatou i te peropheta Iosepha Semita ei peropheta no teie tau tuuraa hopea no te evanelia. E te faahanahana nei tatou i te mau taata atoa o tei mono mai ia'na ei Peresideni no te Ekalesia.

Ia paturu tatou i te mau peropheta e te tahi atu mau feia faatere,<sup>6</sup> te faaohipa ra ia tatou i te ture no te fariiraa amui i roto i te Ekalesia no te mea ua parau te Fatu : « E ore roa e horo'ahia'tu i te hoe taata ia haere atu e ia poro haere i ta'u nei evanelia, e aore râ ia faatupu i ta'u nei ekalesia, maori râ ia oti oia i te faatoro'ahia e te hoê o tei mau i te mana, e ua itehia ho'i



e to te ekalesia e e mana to'na e ua faatoro'a-ti'a-hia ho'i e te mau upo'o faatere no te ekalesia ».<sup>7</sup>

Na teie e horo'a ia tatou, te mau melo no te Ekalesia a te Fatu, te ti'aturiraa e te faaroo a tutava ai tatou ia haapa'o i te faaueraa a te papa'iraa mo'a ia faaroo i te reo o te Fatu<sup>8</sup> ia tae mai na roto i te reo a Ta'na mau tavini, te mau peropheta.<sup>9</sup> Ua piihia te taato'araa o te feia faatere i roto i te Ekalesia a te Fatu na roto i te mana ti'a. No reira, aore roa ia e peropheta aore râ te tahi atu taata faatere i roto i teie Ekalesia, e pii ia'na iho. Aore roa e peropheta e ma'itihia. Ua haamaramarama mai te Fatu i te reira a parau ai Oia e, « E ere o outou tei hinaaro mai ia'u ; o vau râ, tei hinaaro atu ia outou, e ua haapao ia outou ».<sup>10</sup> Eita outou e o vau nei e ma'iti i te feia faatere atoa no te Ekalesia. E haamaitairaa râ na tatou ia paturu ia ratou.

E mea taa ê te mau e'a a te Fatu i te mau e'a a te taata. E iriti ê atu te mau e'a a te taata nei i te mau taata mai roto atu i to ratou ti'araa aore râ ohipa, ia paari aore râ ia hapepahia ratou. E ere roa râ te mau e'a a te taata nei i te mau e'a a te Fatu. Ua riro ta tatou patururaa i te mau peropheta ei fafauraa ia tatou iho ia rave i te mau mea atoa no te turu i te mau tautoo-raa matamua e tohuhia mai e ratou. Ua riro ta tatou patururaa mai te hoê tapuraa faa'iteraa i to tatou fa'iraa i ta ratou piiraa peropheta ei piiraa mana e te ruuruuhia i ni'a ia tatou.

E piti ahuru ma ono matahiti hou a riro mai ai ei Peresideni no te Ekalesia, ua parau o Elder George Albert Smith : « Te hopoi'a ta tatou e rave a afa'i ai tatou i to tatou rima i ni'a... e hopoi'a mo'a roa ia. Te auraa ra, e ere ia te haere-noa-raa tatou ma te haape'ape'a ore e ma te hinaaro ia faatere te peropheta o te Fatu i teie ohipa, to'na auraa mau maori râ... e ti'a ia tatou i muri ia'na ; e pure ia tatou no'na ; e paruru ia tatou i to'na i'oa maitai, e e faaitoito ia tatou ia faaohipa i ta'na mau haapiiraa mai ta te Fatu i faaue ia'na ».<sup>11</sup>

Te aratai nei te Fatu ora i Ta'na ekalesia ora !<sup>12</sup> Te heheu mai nei te Fatu i To'na hinaaro no te Ekalesia i Ta'na



peropheta. I nanahi ra, i muri a'e i to tatou aniraahia ia paturu ia Thomas S. Monson ei Peresideni no te Ekalesia, ua farii atoa tatou i te haamaitairaa ia paturu ia'na, i te mau tauturu i roto i te Peresideniraa Matamua, e i te mau melo no te Püpü no te Tino Ahuru ma Piti Aposetolo, ei mau peropheta, ei mau hi'o e ei mau heheu parau. A feruri na i te reira ! Te paturu nei tatou 15 taata ei mau peropheta a te Atua ! Te mau nei ratou i te taato'araa o te mau taviri autahu'araa tei horo'ahia mai i ni'a i te taata nei i roto i teie tau tuuraa evanelia.

Te piiraa o na 15 taata i te ti'araa mo'a no te aposetoloraa ua riro ia ei parururaa rahi roa no tatou te mau melo no te Ekalesia. No te aha ? No te mea e ti'a i te mau faaotiraa a teie mau faatere ia hoê.<sup>13</sup> E nehenehe anei ia outou ia feruri nahea e ti'a ai i te Varua ia faaûru 15 taata ia hoê ? Ua rau te mau huru o te ite e te aravihi i te ohipa o teie na 15 taata, ma te mau huru feruriraa taa ê no ni'a i te mau mea e rave rahi. A ti'aturi mai ! E ite teie na 15 taata—teie mau peropheta, mau hi'o e mau heheu parau—i te hinaaro o te Fatu ia hoê ana'e ratou i roto i te faaotiraa ! Ua hinaaro mau ratou ia tupu mau ihoa te hinaaro o te Fatu. Ua riro te Pure a te Fatu ei hoho'a na teie na 15 taata tata'itahi ia pure ana'e ratou : « Ia haapaohia to oe hinaaro i te fenua nei mai tei te ra'i atoa na ».<sup>14</sup>

Na te aposetolo tahito roa'e i roto

i te toro'a aposetolo e peresideni.<sup>15</sup> E faahaere teie faanahoraa no te taata tahito roa'e i roto i te toro'a, i te taata paari a'e i te toro'a Peresideni no te Ekalesia.<sup>16</sup> E horo'a mai te reira i te tamau-noa-raa, te paari i roto i te aravihi, te ite, te faaineineraa, mai te au i te arata'iraa a te Fatu.

Te Ekalesia i teie mahana ua faanahohia ia e te Fatu iho. Ua haamau Oia i te hoê faanahoraa faahiahia no te faatereraa o te faatupu i te apipitiraa e te pa'epa'eraa. E horo'a mai taua faanahoraa ra i te arata'iraa a te peropheta noa'tu te mau ma'i e te mau haaparuparuraa e tupu mai no te faito matahiti paari.<sup>17</sup> Te vai nei te mau faaifaitoraa e te mau parururaa e rave rahi ia ore te hoê taata e arata'i i te Ekalesia i vaho. E haapii tamau-noahia te mau taata faatere paari ia ineine ratou i te hoê mahana ia parahi i roto i te mau apooraa faatere teitei roa'e. E haapii ratou nahea i te faaroo i te reo o te Fatu na roto i te mau muhuhuraa a te Varua.

A tavini ai oia ei tauturu matamua no te peresideni Ezra Taft Benson, tei piri roa i taua taima ra i te pae hope'a o to'na oraraa tahuti, ua haamaramarama mai te peresideni Gordon B. Hinckley :

« Te mau ture e te mau tereraa ohipa ta te Fatu i faanaho no te faatereraa i Ta'na ekalesia, e faaineine ia te reira... no te mau huru ohipa atoa e tupu mai. E mea faufaa rahi... i te mea



e aita roa e mau feaaraa aore râ mau haape'ape'araa no ni'a i te faatereraa o te Ekalesia e te faaohiparaa i te mau horo'araa a te peropheta, mai te mana ia farii i te faaûruraa e te heheuraa i roto i te faatereraa i te mau ohipa e te mau faanahoraa a te Ekalesia, ia ma'ihia aore râ ia ore e maraa i te peresideni ia faatere maite.

« E mana e e hopoi'a na te Peresideniraa Matamua e te Pûpû no te Tino Ahuru Ma Piti Aposetolo, tei piihia e tei faatoro'ahia no te mau i te mau taviri no te autahu'araa, ia faatere i te Ekalesia, ia faatere i to te reira mau oro'a, ia hohora i to te reira haapiiraa tumu e ia haamau e ia tamau i to te reira mau faaohiparaa ».

Ua parau â te peresideni Hinckley :

« Ia ma'ihia te peresideni aore râ ia ore e maraa ia'na ia faatere maite i roto i ta'na mau ohipa atoa no to'na toro'a, ua riro ia to'na na tauturu e piti ei pûpû no te Peresideniraa Matamua. E faatere ia raua i te ohipa a te Peresideniraa i te mau mahana atoa...

« ... Te mau uiraa rahi râ no ni'a i te

mau faatureraa, te mau tereraa ohipa, te mau faanahoraa, aore râ te haapiiraa tumu, e tuatapapa-hu'ahu'a-amuihia ia te reira na roto i te pure e te Peresideniraa Matamua e te Tino Ahuru Ma Piti ».<sup>18</sup>

I te matahiti i ma'iri a'enei, a ra'eraahia i te peresideni Monson te tapa'o no te 5 matahiti taviniraa ei Peresideni no te Ekalesia, ua feruri oia i ta'na 50 matahiti taviniraa ei aposetolo e ua parau oia : « E fifi ihoa tatou paatoa no to tatou matahiti paari.

Are'a râ, e apiti matou i to matou reo i to te arii Beniamina, tei parau e : 'E taata mau â râ vau mai ia outou atoa te huru, e tia ho'i ia roohia-noa-hia i te mau mea tia ore o te tino nei e o te aau atoa ho'i ; i maitihia râ vau... e i faatahinuhia vau e tau metua ra... ua haapaohia e ua faaorahia ho'i au e to'na ra mana faito ore, ia tavini ia outou ma te mana atoa, e te hinaaro atoa, e te puai atoa ho'i ta te Fatu i horoa mai ia'u nei ra (Mosia 2:11) ».

Ua parau â te peresideni Monson : « Noa'tu te mau fifi atoa no te ea e

nehenehe e tae mai i ni'a ia tatou, noa'tu te mau paruparu i roto i te tino e te feruriraa, te tavini nei matou mai te au i to matou puai. Te haapapu atu nei au ia outou e te arata'i-maitai-hia nei te Ekalesia. Te haapapû mai nei te faanahoraa tei haamauhia no te Pûpû no te Peresideniraa Matamua e te Pûpû no te Tino Ahuru Ma Piti [Aposetolo] ia tatou e e vai noa te reira i roto i te mau rima maitai e, noa'tu te mau mea e tupu mai, aita e haape'ape'araa aore râ e mata'uraa. Te arata'i nei to tatou Faaora, o Iesu Mesia, ta tatou e pee nei, ta tatou ho'i e haamori nei, e ta tatou ho'i e tavini nei, i te Ekalesia ».<sup>19</sup>

E te peresideni Monson, te haamauruuru nei matou ia oe no taua mau parau mau ra ! E te haamauruuru nei matou ia oe no te hi'oraa maitai o ta oe taviniraa roa e te itoito. Ia ti'a ia'u ia parau atu ei ti'a no te mau melo no te Ekalesia na te ao atoa nei i to matou mana'o amui no te mauruuru ia oe. Te faanahanahana nei matou ia oe ! Te here nei matou ia oe ! Te paturu nei matou ia oe, eiaha na roto noa i to matou rima i ni'a na roto ato'a râ i to matou aau atoa e ta matou mau tutavaraa mau. Ma te haehaa e te puai, « te pure nei matou no oe, to matou peropheta here e ! »<sup>20</sup> I te i'oa o Iesu Mesia, amene. ■

#### TE MAU NOTA

1. « Mauruuru Matou, e te Atua », *Te mau himene*, no. 10.
2. *Te Mau Haapiiraa a te Mau Peresideni o te Ekalesia* : Joseph F. Smith (1998), 232 ; reta tei faahuru-ê-hia. Ua horo'ahia teie faahitiraa parau i te matahiti 1898 e tauturu piti ho'i te peresideni Smith i roto i te Peresideniraa Matamua.
3. No te mau hu'ahu'araa, hi'o Spencer J. Condie, *Russell M. Nelson : Father, Surgeon, Apostle* (2003), 153-56.
4. Hi'o Bible Dictionary, « Dispensations ».
5. E rave rahi mau peropheta tei tohu i te taeraa mai o te Fatu, mai ia Lehi (hi'o 1 Nephi 1:19), Nephi (hi'o 1 Nephi 11:31-33 ; 19:7-8), Iakoba (hi'o Iakoba 4:4-6), Beniamina (hi'o Mosia 3:5-11, 15), Abinadi (hi'o Mosia 15:1-9), Alama (hi'o Alama 40:2), e Samuela te ati Lamana (hi'o Helamana 14:12). Hou te fanauraa o te Faaora i Betelehema, ua ite atea ratou i Ta'na tusia tarachara e To'na ti'a-faahou-raa i muri a'e.
6. Mea faufaa rahi te ture no te patururaa i te feia faatere i roto i te Ekalesia a te Fatu. E paturuhia te hoê taata hou a faataahia i oia no te piiraa aore râ e faatoro'ahia i oia i te hoê toro'a i roto i te autahu'araa.
7. Te Parau Haapiiraa e te Mau Parau Fafau

42:11. Ua faaohipahia te peu no te paturu-  
raa i to tatou feia faatere i te 6 no eperera  
1830 i te faati'a-faahou-raa-hia te Ekalesia  
e i te ava'e mati 1836, a paturuhia i te mau  
melo no te Peresideniraa Matamua e te  
Pūpū no te Tino Ahuru Ma Piti Aposetolo ei  
mau peropheta, ei mau hi'o e ei mau heheu  
parau (hi'o *History of the Church*, 1:74–77 ;  
2:417).

8. Te faaara nei te Buka a Moromona i te ati  
ia tau'a ore ana'e tatou i te mau haapiiraa  
a te mau peropheta. Te tai'o nei tatou e  
« taua fare rahi e te aano ra, o te teoteo ia  
o to te ao nei ; e ua mairi ihora te reira ; e  
e mea rahi roa'tu to'na mairiraa. E ua parau  
faahou maira te melahi... na ô maira : E  
na reira ia te haamouraa o te mau fenua  
atoa, e te mau opu atoa, e te mau reo  
atoa, e te mau nunaa atoa, o te tama'i i na  
aposetolo tino ahuru ma piti a te Arenio ».  
(1 Nephi 11:36).
9. Hi'o Daniela 9:10 ; Amosa 3:7 ; Te Parau  
Haapiiraa e te Mau Parau Fafau 21:1, 4–5 ;  
124:45–46.
10. Ioane 15:16. Te haamaramama nei te  
hiro'a faaroo numera pae e : « Te ti'aturi nei  
matou e, hou te taata e a'o ai i te Evanelia  
e hou oia e faatere ai i te mau oro'a no te  
reira, e mea tia ia'na ia maitihia e te Atua  
na roto i te tohu e te tuuraa rima o te feia  
i haamanahia ».
11. *Te Mau Haapiiraa a te Mau Peresideni o  
te Ekalesia : George Albert Smith* (2011),  
68–69 ; reta tei faahuru-ê-hia. No roto mai  
teie faahitiraa parau i te hoê a'oraa a Elder  
George Albert Smith i te amuraa i te mata-  
hiti 1919. Ua riro mai oia ei Peresideni no  
te Ekalesia i te matahiti 1945.
12. Hi'o Te Parau Haapiiraa e te Mau Parau  
Fafau 1:30, 38.
13. Hi'o Te Parau Haapiiraa e te Mau Parau  
Fafau 107:27.
14. 3 Nephi 13:10 ; hi'o atoa Mataio 6:10 ;  
Luka 11:2.
15. Ia pohe ana'e te hoê Peresideni o te Eka-  
lesia, e ore ia te Peresideniraa Matamua e  
e rave te mau tauturu i to ratou parahiraa  
i roto i te Pūpū no te Tino Ahuru Ma Piti  
Aposetolo. I reira te Pūpū no te Tino Ahuru  
Ma Piti Aposetolo e peresideni ai i te Ekale-  
sia e tae noa'tu i te taime e faanaho-faahou-  
hia i te Peresideniraa Matamua. Ua piihia  
taua taime ra te « apostolic interregnum »  
[mono-faatere-raa aposetolo]. I roto i te  
aamu o te Ekalesia, ua rau te huru roaraa  
o taua taime ra mai te maha mahana e tae  
atu e toru matahiti e te afa.
16. Papū roa, aita taua faanahoraa ra no  
te monoraa i faaohipahia i te piiraahia  
Iosepha Semita, tei faatoro'a-atea-hia  
ei peropheta no te Faaho'i-faahou-raa  
mai e ei peresideni matamua no te  
Ekalesia (hi'o 2 Nephi 3:6–22 ; hi'o  
atoa Aberahama 3:22–23).
17. Ua ite matou e nehenehe ta te Fatu iho  
e pii i te hoê o matou ia ho'i la'na ra i te  
taime Ta'na i ma'iti.
18. Gordon B. Hinckley, « God Is at the Helm »,  
*Ensign*, Me 1994, 54 ; hi'o atoa Gordon B.  
Hinckley, « He Slumbers Not, nor Sleeps »,  
*Ensign*, Me 1983, 6.
19. « Poro'i na te peresideni Thomas S. Monson »,  
*Church News*, 3 no feppure 2013, 9.
20. « We Ever Pray for Thee », *Hymns*, n° 23.



**Na Carol F. McConkie**

Tauturu matamua i roto i te peresideniraa  
rahi o te Feia Apī Tamahine

# Ia ora mai te au i te mau parau a te mau peropheta

*No te faaau maite ia tatou i ni'a i te mau opuaraa hanahana  
o te ra'i ra, e turu tatou i te peropheta ma te ma'iti ia ora  
mai te au i ta'na mau parau.*

**T**e here nei to tatou Metua i te  
Ao ra i Ta'na mau tamarii paatoa  
e te hinaaro nei Oia ia ite e ia  
haroaroa ratou i Ta'na faanahoraa no  
te oaoa. No reira, ua pii Oia i te mau  
peropheta, o ratou tei faatoro'ahia i te  
mana e te haamanaraa no te rave i te  
ohipa i te i'oa o te Atua no te faaora-  
raa i Ta'na mau tamarii. E mau ve'a  
ratou no te parau ti'a, e faa'ite ratou  
ia Iesu Mesia e i te mana hope ore o  
Ta'na Taraehara. Te mau nei ratou i te  
mau taviri o te basileia o te Atua i ni'a  
i te fenua nei e na ratou e faati'a ia  
ravehia te mau oro'a faaora.

I roto i te Ekalesia mau a te Fatu,  
« aita'tu maori râ te taata hoê i ni'a i  
te ao nei i te taime hoê o tei horo'a-  
hia'tu teie nei mana e te mau taviri hoi  
no teie nei autahu'araa ». <sup>1</sup> Te paturu  
nei tatou i te peresideni Thomas S.  
Monson ei peropheta no tatou, ei hi'o  
e ei heheu parau. Te heheu mai nei oia  
i te parau a te Fatu no te arata'i e no te  
haapii i ta tatou Ekalesia *taatoa*. Mai ta  
te peresideni J. Ruben Clark Jr. i faataa

mai, « O te Peresideni o te Ekalesia...  
ana'e tei mau i te ti'araa no te farii i te  
mau heheuraa no te Ekalesia ». <sup>2</sup>

No ni'a i te peropheta ora, te faaue  
mai nei te Fatu i te mau taata o Ta'na  
Ekalesia :

« E haapa'o outou i ta'na mau parau  
e i ta'na mau faauerua *atoa* o ta'na e  
horo'a'tu ia outou mai te noaa ia'na ra,  
i te haereraa mo'a i mua ia'u nei ;

« E farii hoi outou i ta'na parau mai  
te mea ra e no roto i to'u iho nei vaha,  
mai te faaoromai e te faaroo.

« No te mea na roto i te raveraa i  
teie nei mau mea e ore roa outou e  
noaa i te mau uputa o hade ». <sup>3</sup>

No te faaau maite ia tatou i ni'a i te  
mau opuaraa hanahana o te ra'i ra, e  
turu tatou i te peropheta ma te ma'iti  
ia ora mai te au i ta'na mau parau.

E paturu atoa tatou i te mau tauturu  
o te peresideni Monson e i te Pūpū  
no te Tino Ahuru Ma Piti Aposetolo ei  
mau peropheta, ei mau hi'o, e ei mau  
heheu parau. « E ti'araa to ratou, e puai  
e e mana no te faaite i te mana'o e i